

Ngamq gvaq cieng cibhaj, doenghboux okrog bae dajgoeng haenx cungj dauqbae guh hong lo. Gou caemh haeuj suenmak bae mbit di lwgmak, sousib doenghyiengh dap ci bae hagdanz lo.

Gou youq Baekging doegsaw, hagdanz dou liz Guengjsae raeuz gyaе'gyanggyang. Itbuen vunzhek daj Namzningz bae Baekging, cungj dwg cawx biuq diegninz. Seineix hagdanz couh yaek haihag lo, gwnz hojceh hagseng lai dangqmaz, ngamq miz geij boux vunzgeq, dingq gyoengqde gangjvah mbouj lumj dwg vunz Guengjsae.

Boux ninz youq henz ndang gou dwg boux daxbuz ndeu, de gangjvah mbouj lumj vunz Bouxcuengh. Lij miz haujlai nanz dem cij daengz Baekging, youq gwnz roen mbwqmbatmbat, gou couh caeuq daxbuz gangjgoj hwnj-daeuj.

“Daxbuz, dingq mwngz gangjvah mbouj lumj dwg vunz Guengjsae, mwngz daeuj gizneix guh maz ne?” Gou cam naeuz.

“Ranz gou youq Hah'wjbinh, gou miz baengzyoux youq gizneix, geij ngoenz neix daeuj caeuq gyoengqde caemhdoi hae guhcaemz.” Daxbuz han naeuz.

“Yienghneix mwngz roxnyinh Guengjsae baenzlawz?” Gou gig ceuq-leuz, siengj rox de baenzlawz ngeix.

“Guengjsae gig ndei ha, aen geiqciet seizneix gwnz faex lwgmak lij hoij rim go, ndaw naz ndaw suen go-byaek mwncupcup, heuswdsd. Baih

Gwnz Hojceh



□ Cungh Yujingh / 钟汝荆

gou seizneix seiqlengq caenh raen miz gij nae hausaksak, mbouj raen saek di faex nywj heuloeg ha. Mwh youq Bwzhaij guhcaemz, nditndat gig ndei, daengngoengz raeurub, dou youq henz haij doq cimzgn byahaij, gungq-haij caeuq lwgmak, doq ngonzyawj raemxlangh gwnz haij goenjhumhum, sim'angq raixcaix. Mwngz yawj, ndaw daeh neix miz geij roi lwggoyij, dwg vunz Guengjsae soengq hawj gou, neix dwg gyoengqde gag ndaem ndaej, gig ndeigwn ne.” Daxbuz fwngz vix aen daeh laj mbonq lwnh gou naeuz.

Gou baez yawj coh laj mbonq de, caen miz aen daeh bongzbdw ndeu dahraix. De hai bakdaeh hawj gou yawj, baihdaw miz geij roi gyoij-saegungq.

“Cungj lwggoyij neix ceiq ndei-gwn, gyaqcienz hix ceiq bengz, youq Guengjsae miz gig lai. Cungj lwggoyij neix yenzlaiz maj youq baih Saegungq Yeznamz, ndigah heuhguh

gyoijsaegungq, hoeng de deng senj-haeuj Guengjsae daeuj ndaem lizsij gyaenanz, caeux senqsi baenz gij dwzcanj Guengjsae lo.” Gou lumj boux daujyouz bonjdieg nei angq-vauvau dwk naeuz de nyi.

“Dwg ha, cungj lwggoyij baih dou gai haenx, unqnemnem, mbouj ndei gwn, gai ndaej youh bengz. Guengjsae cingqcaen dwg gizdieg ndei, seizneix lij miz baenzlai lwgmak. Danghnaeuz youq baih dou, daengz gouj nyied, gwnzgo couh mbouj miz lwgmak lo. Gizneix makgyaeqgaeq caeuq lwgbug hix ndei gwn, gou cawx le haujlai dawz bae ranz, cunjbei hawj lwg gou gwn. Yienznaeuz baih gou hix miz cungj lwgmak gai, hoeng gyaqcienz bengz hwnj mbwn bae, feihdauh hix citcangcang, mbouj ndei gwn saek di.” Daxbuz danqhaenh naeuz.

“Seizneix mak lij mbouj suenq lai, danghnaeuz dwg seizzah, lwgmak cij miz daihbaj, maklaehcei, mak-

nganx, makgaivaiz, makleiz…… Geq cungj geq mbouj caenh ha! Mboujgvaq sou youq baihbaek seiznit ndaw ranz miz heiqraeuj, youq ndaej cwxcaih dangqmaz, mbouj lumj Guengjsae seiznit doengxhaemh nitsisi.” Gou naeuz.

“Hoeng youq Guengjsae geij ngoenz neix, gou roxnyinh mbouj nit saek di, givwnh cungj dwg 20 doh hwnjroengz.” Daxbuz naeuz.

“Givwnh Guengjsae bienq ndaej gig vaiq, geij ngoenz gonq lij nit dai nit lix, geij ngoenz neix fwt bienq ndaej raeurubrub. Caemhcai gizneix ndaw hoengheiq miz raemx baenzlai, cungj dwg dumzcatcat, couhcinj givwnh yawj hwnjdaej mbouj beij baihbaek daemq, hoeng doengxhaemh hix roxnyinh beij baihbaek nit ha. Caiqgangj gizneix mbouj miz heiq-raeuj dem.” Gou gejnaeuz hawj dax-buz nyi.

“Laxlawz yienghneix ha. Hoeng mehmbwn hix hawj sou baenzlai byaekheu baenzlai lwgmak, sou caemh dij lo!” Daxbuz gangjriu naeuz.

“Mwngz gangj ndaej caemh deng bw. Gak dieg gag miz gak dieg ndeicawq.” Gou gag ngaekgyaeuj naeuz.

Seizneix gou sawqmwh ngeix hwnj gij vah daxboh gangj, guh hot fwen neix:

Ndaej gwn lij ienq mbwn,
Bouxvunz mbouj miz uk,
Yiengjfuk mbouj rox fuk,
Mbouj huk couh dwg bamz.

Bouxbaetgai

清 洁 工

□ Muoqz Nioqz / 蒙宁



Geiq ndaej seiz lij iq haenx, vih siengj son dou gyoengqlwg manz neix, noix mbouj ndaej dingq bohme naeuz: “Lwg ha, aeu dingqvah bw! Aeu yunghsim bae doegsaw bw! Danghnaeuz son mwngz mbouj nyi, mbouj yungh rengz doegsaw, laux le, couh bae bang vunzbaetgai!”

Seizhaenx, baez dingq bohme baenzneix gangj, ndawsim gou couh doiq bouxbaetgai miz cungj moengzloengz siengjap daeuj: Bouxbaetgai goulau dwg gyoengqvunz lajmbwn boux ceiq yaez lo. Caiqlix, bouxbaetgai wnggai couhdwg boux vunz mbouj dingqvah cij ngaiz bae bang vunz baetgai ba!

Laux le, gou gaenq daj lajmbanj okdaeuj lo. Youq ndaw singz, gou caenda raen daengz vunz cienzmonz baetgai. Gyoengq boux vunz baetgai haenx, dwg mbouj dwg cungj vunz seiz gou lij iq gyoengq vunzlaux ciengzseiz aeu daeuj son-gyauq gou? Dwg mbouj dwg cungj vunz gou seiz lij iq siengj haenx nei?

Hoeng, gou soj raen bouxbaetgai haenx, gyoengqde dwg baenzhaenx gaenx guh, baenzhaenx lauxsaed.

Mwngz yawj, moix diuz gai ndawsingz seuqsatsat, nanzdauh cungj dwg gag rox seuq la? Ngoenznaengz baenz cien baenz fanh vunz ndaw-singz byaij youq gwnz gai, gyoengqde swnh fwngz vut gij doxgaij nyapnyaj, caij lij gij mbawfaex faex song henz gai loeng roengzdaeuj daengj gak cungj

gak yiengh nyapnyaj, dwg bouxlawz baet gyoengqde bae ne? Dwg bouxbaetgai baet gyoengqde baenz doi, cang haeuj ndaw doengj, yungh ci rag bae diegnyapnyaj cawqleix.

Danghnaeuz caen lumj vunzlaux baenzhaenx son'gyauq dou, mbouj miz bouxlawz nyienh bae baet gai, gij nyapnyaj gwnz gai ndawsingz daeb baenz bo baenz bya bae. Yienghneix, ndawsingz lij youq ndaej vunz lwi?

Seizneix, ndawsingz raeuz ngoenz beij ngoenz caezcingj hwnjdaej, miz faenh goenglauz bouxbaetgai youq ndaw. Mwngz mbouj saenq ha? Danghnaeuz ngoenznaengz mwngz hwnq romh byaij youq gwnz gai, mwngz itdingh yawjraen gaenq miz bouxbaetgai youq gwnz gai baet lo. Gyoengqde mboujlwnh seizcin, seizzah, seizsou, seizdoeng, hopbi 365 ngoenz, haethaet hwnq romh baet gai, caj gyoengqvunz haetromh okdou byaij youq gwnz gai seuqcingh seiz, bouxlawz ngeix daengz bouxbaetgai baenzlai dwgrengz. Gyanghaemh gyoengqvunz gaenq baeg ra ninz lo, gij nyapnyaj gwnz gai baenzngoengz rom haenx, dwg bouxlawz bae baet? Lij dwg bouxbaetgai swnh gyoengqvunz hwnz ninz seiz, nyinhcaen haeujsim dwk baet gai, cij miz lohdaeng itcig buenx gyoengqde.

360 hangz, hangzhangz miz bouxmaenh. Bouxbaetgai ciengzseiz youq gwnz gai guh hong, mboujlwnh ngoenz nit roxnaeuz ngoenz ndat. Aenvih miz gyoengqde, gwnz gai cij baenzneix seuqsat,



Boux dahsau gyaundeij youq ndaw va'byaekyouzcai.

ndaw singz cij baenzneix gyaundeij. Gyoengqde sinhoj dwgrengz dwk vih sevei guh ok gungyen, raeuz lij maz lijyouz yawjsiuj gyoengqde?

Gij vah vunzlaux hix mbouj dwg coenzcoenz cungj deng bw! Dang bouxbaetgai youh baenzlawz? Gyoengqde baengh song fwngz gaeq gwn haeux, mbouj gouz bouxwnq. Gou aeueiq bouxbaetgai! Gou roxnyinh caezgya cungj wnggai doiq gyoengqde gangj: “Mwngz sinhoj lo, docih!”